

Cancelacion apertura Biblioteca na San Nicolas a cay den mal tera

ORANJESTAD(AAN)--

E hecho cu e apertura festivo di Biblioteca na San Nicolas a keda cancela, a cay den hopi mal tera. Tur esnan cu a prepara pa e festividadnan a keda defrauda.

Manera DIARIO a relata den edicion di Diasabra, a worde planea pa habri e filial di

Biblioteca Nacional na San Nicolas na un forma festivo.

Aparentemente a acerca schoolnan y instancianan manera Verkennerij pa asina tene entre otro un parada y percura pa un ambiente especial den vecindario di e Biblioteca nobo, cu asina kier a atrae publico y muestra nan

ariba loke e biblioteca, cu mester conta cu publico, por ofrece nan. Tambe tabata tin radio cu tabata prepara pa transmiti un que otro vivo y directo.

Banda di esey tabata tin hende na San Nicolas cu ta lora man cu benta di pastechi, refresco, etc. na ocasionnan especial y ora nan a tende cu ta bay tin actividad nan a prepara nan mes.

Lamentablemente Gobierno a dicidi di cancela e planan, loke a haci cu San Nicolas Diavinternatardi no a conta cu e actividadnan especial, cu tabata ademas un forma pa publico cera conoci di acerca cu e biblioteca.

Hopi ta esnan cu a sinti nan mes defrauda. Nan a haya cu asunto di placa no por conta pasobra pa hopi ocasion si tin placa. Asina tin viahamento pa London, tin planan fabuloso pa Miss Universe, pero pa un actividad na San Nicolas si no tin placa.

E forma cu cosnan a bay a laga un mal sabor atras especialmente cerca tur esnan cu a haci preparacionnan pa un actividad, cu simplemente a worde cancela.